



01. marts 2024

UPA2024/130

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Inuussutissarsiutigalugu aalisartut piniartullu pisortanit ikiorserneqarnissamik inatsisitigut periarfissaat aammalu kommunemi allaffissornikkut kingunerisassai pillugit Naalakkersuisut nassuiaanissamik peqquneqarnissaannik Inatsisartut aalajaangiiffigisassaattut siunnersuut

(Inatsisartunut ilaasortaq Doris J Jensen, Siumut)

Tungavilersuut:

Ukioq kingulleq qallunaat nunaanni Kalaallit Peqqissartut Illuanniinninni naammattoortarpakka aalisartut piniartullu arlallit nappaammik eqqugaasimallutik katsorsartinnertik pissutigalugu inuussutissarsiutiminnik ingerlatsisinnaanngitsut. Tamannalu tungavigalugu pisortanit ikiorserneqarnissamik qinnuteqartarsimasut, iluatsinngitsumilli. Uani tungavilersuutigineqartarluni, namminersortutut inuussutissarsiuteqartuuneq pissutigalugu pisortanit ikiorserneqarsinnaanngitsut.

Naak aalisartut piniartullu pisortanit ikiorsiiffigineqarsinnaanerat Inatsisartut inatsisaat (pisortanit ikiorsiissutit pillugit inatsit nr. 6, ulloq 20. juni 2022, kapitali 4 § 12) naapertorlugu periarfissaareeraluartoq, maannamut suli ikiorsiissutinik pissarsiniarneq aporfeqartartoq katsorsartittut tungaannit oqariartuutigineqarpoq.

Uanilu kommunit tugaannit ilaatigut tungavilersuutigineqartartoq tassaavoq, inuussutissarsiutigalugu aalisartuq piniartorluunniit qinnuteqartoq suliffissarsiortutut nalunaarsorneqaqqaartigani pisortanit ikiorsiissutinut qinnuteqarsinnaanngitsoq. Imatut paasineqarsinnaasumik; inuussutissarsiutigalugu aalisartutut piniartutulluunniit inuuniut qimaqqaarlugu aatsaat pisortanit ikiorsiissutinik qinnuteqartoqarsinnaasoq.

Naak, Inuussutissarsiutigalugu aalisartut piniartullu piumasaqaatinik, tasanilu malittarisassanik aalajangersarneqartunik, naammassinnissimaneq aallaavigalugu, pisortanit ikiorneqarnissamut pisinnaatitaaffeqarnerat inatsimmi ersarikkaluartoq, taamaattoq kommuneni allaffissornikkut sullissinerup kinguneriumaagassaasa suunerinik ilisimatitsisarnenerit annikippallaarnerisigut, llaatigut apeqqutit makku, pisortat sullissiviisa tungaannit aamma akiuminaatsinneqartartut pilersinneqartarput;

- Inuussutissarsiutigalugu aalisartuulluni piniartuullunilu suliffissarsiortutut nalunaarsortinnermi kingunerisassaataat suuppat?



1. Inuussutissarsiutigalugu aalisarnermut piniarnermullu allagartamik annaasaqarnermik kinguneqassava?
2. Suliffissarsiornermut nalunaarsortinnermi naliginnaasumik suliffissarsiortutut malittarisassat aammalu piumasaqaatit, soorlu ataavartumik nalunaarsortittarnerit aammalu suliffissamut piareersimasussaataanerit, inuussutissarsiutigalugu aalisartumut piniartumullu aamma atuutsinneqarpat?

Taamatut tunngavilersuuteqarlunga pisortanit ikiorsiissutinik qinnuteqarnermi tamanut assigiimmik paasiuminartumillu sullissinerup ersarissarneqarnissaa siunertaralugu Naalackersuisut nassuiaateqarnissaannut peqquneqarnissaat siunnersuutigaara.

Pisortanut aningaasatigut allaffissornikkullu kingunerisassai:

Nassuiaasiornissamut piffissaq atorneqarsinnaasoq naatsorsuutigineqarpoq qaammatini pingasuni sivilissuseqassasoq, aningaasanngorlugu kr. 125.000,- missaat.

Namminersortunut aningaasatigut allaffissornikkullu kingunerisassai:

Soqanngilaq.

Innuttaasunut aningaasatigut allaffissornikkullu kingunerisassai:

Allaffissornikkut sullissinerup kingunissaanik nassuiaasiornep inatsisitigut periarfissarititaasut ersarinnerulersissavai.